



Mehlab taw ché gwashay

Mehlab Nasir

Mehlab taw ché gwashay

Mehlab Nasir

**Sahitya, Stockholm, and
Balochi Language Project, Uppsala University, Sweden**



Mehlab Nasir



UPPSALA
UNIVERSITET

Jahitya

Mehlab taw ché gwashay

Mehlab Nasir

**Sahitya, Stockholm, and
Balochi Language Project, Uppsala University, Sweden**

Ketáb:	Mehlab taw ché gwashay
Tahr:	Sháeri
Sháer:	Mehlab Nasir
Awali cháp:	2019
Shengkár:	Sahitya, Stockhom, and Balochi Language Project, Uppsala University, Sweden

Copyright © 2019 Mehlab Nasir


É ketábay sajjahén hakk nebeshtahkár rayg ant o kass bé jostá é ketáb yá eshiay bahré cháp o sheng korta nakant. Albat agan pakár but ta nebeshtahkár, ketábay kojám ham bahré wati nebeshtánkáni tahá hawár korta kanant, bale gón é ketábay sarjamén sarshóná.

ISBN: 978-91-984736-3-6

Mehlab, taw ché gwashay wati nimmónay bábatá
Jengol taw dáshtagant ke tará bál dósta bit

Mehlab Nasir

Námdát



Mani Abba,

Tai nazzén chammáni poshtá pétkagén wadáray námá.

Tai dastáni hamá samáray námá ke tai gománá é ketábi martag.

Tai lontháni hamá wáhagay námá ke é shayri wánag lóthetagant

O

Tai jenday námá.

Larh

Pajjár	11
Bégwáhén Gwánk	13
Hinnár	15
Hawr shap kaptagán	17
Kaddahé proshtagán	19
Nazánay hecch ásari?	21
Páhár	22
Sózmán	23
Sapardard	26
Hasti	28
Hórk	29
Bósht	30
“Chó makan”	32
Pendulum	33
Mehrtramp	34
Par rechán án	36
Zerbám	37
Gerdám	39
Zendrang	40
Watará bar góń	41
Bale é zémelán bellét	43
Nedáragáni nun chamm nazz ant	45
Nájáez	47

Góyák	49
Mókó	51
Gobárestán	53
Áprang	56
Lóli	58
Kay nun tai rangá bezant	61
Bastagén dar	62
“Agán...”	64
Dréyatay sapar	66
Sherisshay sáhegay bar	67
Pohl	70
<i>A walk</i>	71
Watkoshi	72
Sarpad án	73
Watá maróchi ráh beday	74
Róhél	77
Wadármayyet	79
Kay ay?	81
Shayr	84
Górtahár	85
<i>A touch, a click</i>	86
Gwashay é eshk zikkén ent	90
Hodáay métág	92
Drohén kessah tará góñ ant	95

Ali ján!	98
Delay darwázag	100
Watá cha dar man tará shoházán...!	101
Zenddám	103
Wati bégwáhiáni gwáhay patthagá gár án.....	105
Goddhi jón	107
Drohén sahdár margay támá chashant, dardará kay sarpad bekant	109
Mehlab halásén kessahé.....	111

Pajjár

Mehlab Nasíray asli nám Zarján ent o petay nám Nair Ahmad ke Nasir Ahmad Górhiai námá zánaga bit.

Mehlab, 18 December 1982á Hayrábád, Kéch Balóchestáná wadi butag.

Tán pacnchomi kelásá Górhiai wánagjáhá wantagi. Wati métagay awali janek butag ke eskulá wánagá shotag. Cha panchomi kelásá o dém Górhiai wánag nabutag, pameshká Mehlabay pet, Wája Nasir cha Górhiai laddhetag o Torbat shahrá jahmenend butag.

Torbatá eskulá rand 2002á cha Torbat Kálejá *Sociology, History* o Balóchiá BA kortag. 2006á cha Balóchestán Yuniwarasthi Kwaythahá Engrézi Labzánká MA kortag.

Pésará Torbatay bázén eskulán wánéntag o 2009á Balóchestán *Public Service Commissionay* chakkásán sóbén bayagá rand Torbatá janekáni kálejá Engréziay lekcharar butag. É nyámá Torbat Yuniwarasthiá ham wánénagá butag.

Gón labzánká bandók bayagay sawabá nebeshtah kanag Mehlabay tabá hamráh ent. Kessah, nebeshtánk o rajánká abéd nökén nazmay sháré ham.

É Mehlab Nasíray awali ketáb ent ke eshiay tahá Mehlabay bendáti zamánagá beger dán 2018á nebeshtah kortagén shayr hawár ant.

Bégwáhén Gwánk

Ádénkén sahat ant

Chammán proshant mani

Darday namáragá taw ché gwashay begwash

Ars ant ke hón atant

Didókán chelsarén

É ché atant golén sohrjigé ratkagat

Zi kágadé man dist chérá tagerdéay

Bárén é kay o kai námá nebeshtagat

Chó jónéá gwashay pirzálé pánag at

Dardé nebeshtagat

Torsé nebeshtagat

É kágaday do gál ajgén tawár atant

Góshán nakaptagant

Kassá narastagant

Chó zánagá atán

Tábán yakké at

É kappiéñ habar

Násarjamén é gál

Bátélá sang atant

Arwáhay rang atant

Aksáni rombé átk jostáni thólié

É kágadá cha pad kay bárén bortagat

Kay bárén raptagat

Kárest gár atant

Ádénkén sáhatán

Góyák tal kotant

Hinnár

Man damánáni halásiy abadmánén mosáper

Ke nazánán kotthag

Wahday andámá drahag

Hórkén wadárá nendag

Báz dam bortagán

Rés par retkagant zerdøy anchó

Ke hamok tábá padard ent bechkand

Chó maná gwátéá mesle jambar

Gón watá dur patátag bortag

Má hamódá gón wati jendá kamátag wati tahnái gón labzán

Padá sendán kotag

Chont bará pa tará sar buagay johdá man watá ér bortag

Gerdén ópárá chakarréntag maná áwortag

Nun padá jáh hamá ent man wati rangá án

Taw agan ósta kanay

Kammé maná bell tahná

Mani ómánay sapar angata ér retka nakant

Man wadárig hamá sáhatay pa wat

Taw watí jenday samárá maná pajjáh byárav

Byá maná shayré bekan wáhagá drikkaga lóthán

Tai tahá nakshé man ápay saray buaga lóthán

Taw ke sara kasshay, begenday o bekenzay man tará góon bebán.

Hawr shap kaptagán

Tará che kár góñ shapá?

Tará shapay wadár ché?

Mani hamok damá shapé balit

Nun bé tará

É hastié ke néstián wadi kotag

Taw zánay? Annun hawré gwáragá ent andará

Darigay démá

Á kashá

É aks manig ent bátenay

É tramp o arsay syádi ent

Delá rechit agán dará

Zeminá namba kant yá sénagá mani

Bale taw wahday gardeshán badal bekan

Shapáni jáhá róch kan

Shapay balag wa dérigén nun ádaté

Taw róchán áhagay besách o byá

Begwár

Delay dhagár o dhannán tarr bekan

Mani wadará tarr bekan.

Kaddahé proshtagán

Anchén dardán gwastagán marchi

Tará jérhag najérhag nun nabit

Tará thékia kanán jenday tai

Wat góna bán

Byá zendagi do bara kanán

Yakké hamá ke gwastag o domi hamá ke nuna gwazit

Hamráhiá

Éwak makan

Na ke watá, na ke maná

Chó sar gerag...!?

Zánay rawag chéá gwashant?

Jenday sedag taw distagant?

É ham hamá paym ent watá jendá cha gestá gendag o jenday wadár

Chó tramp o nambay sar sedag

Hawráni mósom bell gwazant

Randá tai yátána zarán

Chó dela nabay

Pa man zaray jáhé delá
Hawráni nambi sóra bant
Záná damáné grétagay
Taw gréwagay kárá makan
Del saggagá dazgattha bit
Arsay badag ham mósomé
Angat wadáray ásari
Angat shoházay dam barag
Wahdá cha pésar chóna bit
Báwar makan békáwarán
Áyag tai man sázetag sáhay tawáray zayméá
Delband dastá ér kotag
Zántag ke man éwak naán é sénagá
Arwáh tai drikkag mani
Angat tasallá ágah ent
Angat delay sahrhag maná sarshap tán sohbá pádag ent
Bé taw nabuag ádaté
Békára bán bé taw bebán.

Nazánay hecch ásari?

Hamokk róch

Gaméay kessahá cha pad

Gwashán

Nabit dega padá

Bale

Hamokk padá cha pad

Namánit hecch kessahé

Tará cha pad man anga pádi thappán pánag án

Wati

Dayáray sáhegay

Kojám darán cha átkagay

Potertagay taw hastiá

Ke har damán nóka bay

Páhár

Delá nun gama nakant jágah
Hamok offár zamzil ent maróchi
Wadáray ásaray róch ent gwashaygá
Taw káay
Anchén ótágé man setkay dámoná kasshit
Nun chammay nazz kanag hecchi natorsit
Delá purah godé zortag mán kóndhán
Sherishi sáhegé neshtag
Chón saddakk ent
Wadári sáhaté zánay modámi ozr sáchán ent hamé rangén
Baré gón sengéá darwázagá shama kant o nendit
Tawáráni padá chakká natarrénit
Delay chawlán warhé dárit delgóshá
Gwashay halwata kanant pábramsh samáray
Garmié márít
Gwashay nun atk o sar butay
Choshén báwar gorhá, Mehlab!?

Sózmán

(Mordagén zerdáni námá)

Chónén zórákié, chónén békákié

Man ke bah mánag án

Anchén békákié

Sáhegáni sapar róchá dar bortagant

Chónén eshtápén róché ke ér bokketag

Chónén syáhén shapé ke tanakki nazánt

Chónén wábé ke hechbar é chamm pacha nabant

Chón cherágáni télánká sohbé balit

Chónén estál ant, bramsháni wázmandag ant

Chónén offáré, róchárá danzéna kant

Chónén chamm ant ke angat wadará pach ant

Chónén ópáré angat delá cha narawt

Lankoké ham cherágáná konnat bekant

Purroké ham agán ráhán gomráh bekant

Bucchoké ham agán kawrá gomsára kant

Chónén lillámié, sáhay kapp éra bant
Chónén ápé ke hónáni jáhá tachit
Chónén rastartab ant, jendá páphant, warant
Chónén hóshámé hónay delán tala janant
Chónén kólenjén dardé ke máraga nabit
Chónén bechkandag ant ke pashómána bant

Chónén ars ant ke arwáhá ér bortagant
Chón é békonthagén poll sendag mabant
Kayá rakkénán, bémollay sawdá mabit
Chónén drógén tasallá watá dáttagant
Kai man chondhán chenán, é man án, proshtagán
Kayá tazhné janán, kay mayáriga bit
Man ke lillámay tahtá wat án, bastagán
Chón man ásudag án...!
Chón wadárig án man
Chón nakenzán, najonzán, man shar neshtagán
Man ke hayrán o wáng án, ajab kessahé
Mordag o sengén aksán gón tráná án man

Kai man rozhnay wadárá cherágán koshán

Kai man óbádag án ke wapá kota kanán

Man ajab mortagán

Man ajab jóné án

Éwaká sáhay bandikká gok bastagán

Chónén zórákié

Zerday margá zarán

Sapardard

Abétki bechkandá chó gwarigá sendit o dánag dánaga kant

Dard chindhok chenána kant

Tán kópagán sara bit

Báré bit

Báz gránén sáhat ant

Bale chó gotthé ápá éra rawant

É kay ent?

Nágománén gománáni báhótha kant o rawt

Sáhat ant

Gir ant

Tawár ant

Gomán par rechán ant

Hayálán patáhán ant

Gwastay sáhatáni darigán lahtén bechkanda thokkit

Gwazit

Darig sham bayána bant

Dar pach bayána bant

Alwatén lezzat ant

Lahtén labz ant

Abétka kanant

Chamm o arwáha tachant

Ásará enserant

Taw ke dar kaptagay

É hamá sáhat ant

Hasti

Zend trahagay shoházá sarsara jant

Bale dar ágahiay wábán ásar nést

Wati jenday hasti ham chó badwáhén máréá arwáhay sará shép gerán o patáhán ent

Zend drógé

Zend drógé

Paméshká dhawldár ent

Chó barpay botá hazár rangá singári bekan

Bale godhsará ápa bit o rechit

Hastii békáwar ent.

Hórk

Maróchi del

Wáhagáni kabrestánay kashá gwastag

Nazánán man wati chamm kojá kall kotagant

Á sahat shapé at

Arwáh padi gámán jonzán ach damánán dar kapt

Maróchi chéay shoház ent?

Edá hawráni gwárag

Mósomi bahré naent

Zeminay talwasag trondén ragámi wáhagé

Kabráni sártén dróshom ent

Marchi shamóshag béwat ent

Arsán hawár ent béwasi

Dard ant ke jambar bastagant

Gréwant delay kabray sará

Bósht

Enshapi

Estál ham cha cholléá

Chest butagén duttán

Ajab ambázetagant

Anchó gwashay saparéá mani kashay darigay shishagá

Mosáperén sohbéá

Sártén gwátá namb bádéntag

Dhanná nedáragán malmalén sarigé póshetag

Surmagén bámgwáhéá angata róch mán shapay goddhi ambázán wáb ent

Hamé paymén shapéá, máhay chárdahá, daryá ach watá gisshéntag

Keshk kasshetag

Man hamá rozhnáén damáná gám janán ach watá dur rawán án

Taw bale...

Hamé nambén cháderay

Máhekánay arwáhay

Man angat saparay lankok dáshtag

Bale kojám chizzá gir byárán
Ke tai tránagáni gamán bedárit
Tand bebandit
Chó nambay gosháná
Angata bell hech magwash
Angata dar bastagén békárháriay
Béwánkiay
Béwáriay gappá makan.

“Chó makan”

Sarátay pohlay

Mudi thálay nyámá

Delay óshtag

Na zuraga bit, na dróhaga bit

Na jonzaga bit, na dárag

Sawábi kára parmáay delá?

É anchén kahr o zóráké wati jenday kodénag washterén kár ent

É zahmay sáhegá zóráké rishkandit

Namannók ent.

Pendulum

Wasshiá cha pésh o paday

Abadmánén dardéá zendagán

Gwashay dur zemestánén wáhagéay pad geptag

Óshtátag rang o bó o támáni aksé cháragá án

Hatam damáné

Mósomé naent

Anchosh gwashay kolaw átkag ke

Embari tákchandhá taw wátara bay

O maná mósome baháray gwazagay eshtáp ent.

Mehrtramp

Alwatén damánéay nebisagá neshtán

Chakpadán hech namantag ke padá wátarrán

Dém daryáé gwashay naksh chetag bénakshén

Jonzagá góñ bebay, góñ naay, chóna rawán

Zenday ózhnágá ajab aks mani démá kayt

Chinchok jost ant ke padá orsh kanant, mán bandant

Malkamutén delá hakkall shamoshtag chinchok

Saggé hamráh kotag, latthay warhá

Nun chedá sar geptán

Bale

Chakpadán hórkié ham gwáha nakant

Zend wa daryáé, edá naksh kadi pashta kapant

É gayábé chedá pádáni padán gwáta barant

Damánay dárag mabutén kessah

É jenday arwáhay butén aksé

Bale nabuag

Ohe nabuag

Bale é mósom naant delay band

É ás o áp ant

Doén azáb ant

Naent tai tránag é margi nawbat

É zenday rólah nabit bámé

Azába táchay

Yá náchay shádeh man zenday jend án

Maná shamóshay kojá raway taw

Man jenday jend án.

Par rechán án

É alwatáni damánay gapp ent

Ke bé samár ent

Modám jérhán tai tawará ke bétawár ent

Man chincho poshtá shotán nazánán

Do nazzén chammay

É nazzén chammáni poshtay wábán

Bezánán báyad

Ohe nazánag

Zeray patáhag che káré shank án

Taw chammán pach kan

É kawl zenday kayárá dátág ke zendag án man

É zenday kessah bebant góñ man

É ás o áp ant

Drohén azáb ant

É zenday jend ant nabant kessah

Man paddraháná tawári aks ant ke par rechán ant.

Zerbám

Wasshi damáni kessahé

Mehray awal chárhay warhá

Morgay awal bálay hamá torsay warhá

Bégwáha bit

Zend bégahé

Démá shap ent

Bámay wadár

Zenday samár

Tán kad wati jenday tahá

Margi o zendj jangéá katraha gwazant

Zendá bejérhán yá watá

Yá ke tará

Har do taw ay

Man bé tará zendag naán

Zenday abadmáni taw ay

É jérhagán

É módagán

Balkén bebutén ásaré

Taw hastiay shayré kotén

Nókén padá

Zánán nabit

Wasshi gománi sáhaté

Zuraga nabit

Dróhaga nabit

Zenday hamok darday warhá

Shap kenzagá béhála kant

Shap darda bit jenday watí

Dardi zeré

Dardi tahárén zémeré

Man zémeray arwáhay zaym, é sáhatán

Sázit maná pa deltabi

Pera bandit har shap yak warhé

Bárén zahiri sázé án

Yá mótké án man zendagén

Bechkandéay.

Gerdám

Man chinchok aks kasshetag

Delay bale

É zaym o thapp

Hamok damán nóka bant

Á rang naant.

Zendrang

Mani kóthiay darigay á démá aksé hast

Charáiá morgáni tawára kayt

Bale

Drachkáni táká nasorant

Chinchok dhawldár ent bétawárén aksáni zémel

Drachkáni áshóbi tabay kessahá kárant

Á wati baráni bárán zorta kanant

Drachk dardiga bant

Esháni baráni sendagay wahdá

Drachkáni máresht allam anchosha bant

Ke

Ach mátéá chokké sendag bebit

Drachkáni chihál

Ajab bétawárén aksé

Mani kóthiay darigay á démá

Ajab bétawárén aksé chihála jant

Watárá bar gón

Zenday óshtátagén wahday poshtá

Gámé

Bas yak dam bortagén gáméay kópagán cha kapag

Balkén maná bandikkay á dastá dawr bedant

Ke ódá wáhag nót ant

Dard damtós ant

Wasshiáni hatam sáz ent

Zend zémelay dróshom ent

Bale

Wadáráni pánagi wassh ent

Tákchandhá nendag o baháray lezzatáni

Wasshén bóáni

Drin rangáni wadár

Ach baháray mósomay jérhagán washter ent

Man neshtagán

Tai nyáhagay pánagi washter ent

Cha béásarén ométán

Bale man saddakié besázán

Angat delá hech sapar nakoshtag

Haminchok ráh ant

Man sargerán án

Taw kenzán ay

Bale é setkárá ásar nést

É dors sharr ant

Agán taw byáay

Bale

Delay nun omét ér rechán ent

Nadáragá ent

Bale man jérhán

Bale man jérhán

Man jérhagá án

Shotay taw sharr ent

Taw nyáay sharr ent

Maná bebar gón

Wadará bar gón

Bale é zémelán bellét

Har róchigén nedárag

Har róchigén bazhn ant

Damán jonzán ant

Bale

Na nedárag badala bant, na bazhna trahit

Tasallá torséá thappit wáb géjít adárokké

”bale sawté watan námit”

Hamok kondhá sapara kant zémerén máresht

O bégwáhiáni bazzhenákén kessah bazhna ródénit

Latth wártagén wadár ant ke chamma latárant angat

Thapp tán darda mattháyant

Arwáh héla kant saggag

Nedárag mattha nabant

Nedárag

Lahrh o páhár ant ach negáhán andará bokkant

Andámay ján éra rechit

Bale maróchán ach mordagén chammán

Zadagén arwáhé sarokka nadant

Apsóz béwasi!

Deláni ér rechag bas adároki gappé

Padá hamá dard ke bechkandant o padá kandant

Bazhnáni marg ham damánoki kerd ant

Armán mordagi!

Nedárag mattha nabant

Pa chammáni per tarrénagá

Bale báhanda ókárant

Hamok róch

Nalóthit bazhné ródénag

Hamé yakkén darday apsóz o trahénag

Hamá bazhn ent ke sara kasshit

”Bale é zémelán bellét”

Kash o kerrán

Nedárag tán hamé mánant

Hamok róchá

Tán abad wábá

Tasallá torsé chandhénit

Nedáragáni nun chamm nazz ant

Nedáragán tai negáh naksh atant

É ráh hamá ent gwastagay

Maróchi bésamáiá

Gón wábay nazzén didagán, gón ágahén hayáléá

Chó wahday rang matth kotag

Nedárahchárén ráh o rand

Tai gwazag anágahá

Kojá shotay?

O joddhiay jorháni rang

É hóni bó ant, aksa bant

Báma bant ke rólah ant

Doén delá nun yak warh ant

É gam maná ke nazziká barant

O lezzati damáné pohla bit

Wahday tattarag chedá kapána bit

Delá ón dózahé joshit

Bale nun sártén sénagé

Wadáray nazz ant har do chamm

Sapar modám dém pa taw rahádag ent

Bale koj ay?

Kojá shotay?

Man sáhegáni sangati

O katraháni gapp o trán

Pétkagant

Nun éwak án

Wadáray nazz ant har do chamm

Nalóthagé kolaw kotag

Nayáyagé wadi kotag.

Nájáez

Mehlab!

Taw nazzén chamm distag?

Haw, man nonnoki kabré kotag sargwaz

Man zántag

Edá kall ent armáné

Damáni lezzaté sahá zebahrén

Hatar dátág

Kayá mehray baré sestag chagal dátág?

Sh...sh...sh...sh...sh....!

Edá mehray mager námá

Edá bas zendagi daskhattán bandók ant

Hamá jáh ent

Edá paywand ádamzáf chó drachkán

Chó macchán gonsh kanaga bant

Do badan éwak

Hamé thappa pakár ent?

Haw, agán anchosh mabutén taw mani paymá

Gománá poll nachokket o é gwandhén kabray delbandá najérhet ér butén
poll

Gorhá, kabray nesháné ché pakár ent?

Arhay, taw shar ganókay

Bani ádam ke sáhé kasshit

Baláhén kerdøy wáhond ent

Kojá kárá wati dhabbit, tamardén

Edá mehráni kessah chó halás ant

Bale

Nun bass ent, mardomi bramshé

Chedá pád á ke balkén tai hayálá ham tará maylit

Kai kabray sará nálay

Góyák

Morgé labza kant modám

Darigay domi némagá

Mani delá é yakkói

Tawáray yakkén zémel ent

Nazánán chónén kessah ant

Ke yakkén labzi kant bená o yakkén labzá ásaran

Baré é labz nóda bant

Baré é dard o dóra bant

Bale é morg ché gwashant?

Kojám dardá pánag ant?

Kojám wasshiá zarant?

Baháray mótkawána bant kojay kojay?

Hamé warhá é zendagi

Hamé warhá é syádi ant

É gwast morgi bánzolé

Ke ach ketábá dara kapit

Baré golábi táké zend

Mósománi tránagé

Ke tal tal o borána bit

Gir, wasshén bóa bant

Ketábá zendagániay

Baré é báli tránag ant

Baré kapóti nálag ant

Samará lahm lahmén alwat ant baré baré...

É zendagi rawána kant

Bale nesháná óshtéay

Modám har do chamm kapant

Bale gománá gwastéay modám yáté zendag ent

Mókó

Hayáli dámé zendagi
Chó mókóay kodáméá
Tanag Hodáyá distag o
Thahéntagi pa ádamay arhénagá.

Gománán mán gisshetag
Do gámá mán gisshetag
Chó gerd gerda tarragá
Hodá ón mán gisshetag
Chó mókóá.
Baré yak jágahé shotag
Pa nökén dámay sázagá
Hazár rangá matthetag
Jetáén rang andará
Jetáén tahr o dróshomán
Watá cha dar
Baré hayáli thokkoré
O sengé tráshtagén baré baré

Kodámé róchá shahma kant
O drinay dróshomá trepit
Shapán gamáni ranga bit
Patáit zenday shádehán
É dám hastié gwashant
Hazár rangá bráha dant
É rang dors wáhag ant
Drohén Hodáay bastagén chó mókói kodáméá
Deláni syádiáni dám
Mehray máragáni dám
Kast o kénagáni dám
Koht o dróhagáni dám
Bazhn o sóchagáni dám
Wasshén lezzatáni dám
Pa arséá mechách dám
Chó mókóay kodámá bálóé
Ke palpathit o saha dant
É zendagi tán zendag ent
Hodáay dámá dar kapag wadia nabit.

Gobárestán

Kojá mehráni kessah gonga mánant

Delay mósom dapá sabzant gorhá labz ant

Padá wáhag kojá mánit?

Padá dárag kojá dárit?

Bale del kódaké, offára kasshit

Padá ach didágán sabzit gayábé

Padá meskáni dozzag?

Padá mehlab nashengant?

Begenday dar kapay ach ráh o randán

Damáné

Bas adáré

Bale ráháni nökén thappa mánant

Begenday shapjaté estála sendit

Bale dardáni syáhén torsa shánant

Begenday kóh lahm ant mesle pokki

Bale bégwáhián gaddhag baláhé

Begenday mósomán sahté wapá kot

Bale gerden

Hamá gerdén lakir ent, padá kárit

Nazánag ach kojá zánté shoházit

Begenday zánt o wáhag sak jetá ant

Bale wáhag nazánag?

Begenday zendagi dardán namárit

Bale zenday tahá darday namárag?

Choshén mordag?

Ajab sáhé dar áhag gerra bandit

Azáb ant

Droh azáb ant

Hamá ke keshka randit

Hamá télánka saggit

Begenday wáha matthant

Begenday ráha matthant

Bale eshkay mosáper

Kojá tähira patthant?

Begenday bewisí óstá bedróhit

Begenday óst wat bewis bemánit

Bale angat delé ke pahra bandit

Bale angat jorháni namba shanzant

Bale angat gobárán malmalénán

Wasé offán góñ offárán karójit

Wati hákay shamóshag?

Padá háká hawári?

Padá máreshtay móñesh...

Hamincho éwak ent hasti gwashay yakké namantag

Wati jendá góñ pandal

Wati jenday shegáni

Ajab zendáné wáhag

Begenday jóna sahrhit

Bale arwáhay dózah

Hazári wába sóchit

Baheshtén wáha bréjít

Begenday darda chotthant

Bale dardán cha chotthag?

Wati jendá cha chotthag?

Áprang

Baré baré halása bán

Na gwasta bit na ásaré

Nazánán kay ent éwak ent

Mani kashá

Ke pash kapit

Na labzé bit, na nésta bit

Na daz janag, na gára bit

Ke lahm lahmén sártié samáragá hawára bit

Rawag nazánt, dará nabit

Chó békobánén alwatá

Chó gwáti lahmén trampéá

Samará ér rechána bit

Delay tahá kodána bit

Hamé damán béwas ent

Gwashay tayáb kenzetag

Gón zhand o pandén johdéá

Watá zerá yalah kotag

Chó morgi bálá sestagén man bánzolá hazár bar

Deláni óst distagant

Ke wáng wángá neshtagant

Chó laybóá zebahrén zahgéá karotkagant

Bale man án ke pa wat án

Wati kashá

Wati tahá

Ke nésta bán

Hamódá taw rodána bay

Chó óstéá.

Lóli

Tai békánki ásar but

Hamá bédánkén gapp hejbar narastant pa mani góshán

Bale man máretant

Mani lóli

Modám taw chó mani arwáhá tonnag

Mani kohtay warhá békánká kall butay

Mani bazhnay warhá mohtáj dar kaptay

Bale nun gira káay

Tai jáh chó mani hórkén wadárán ent

Nazánán chón man cha taw béhabar bután

Nazánán chón napahmet chinchok názork ay

É tabdén gwát

Tai chón morpadén rangará matthénit

Man zánán yakk o tahná é jaháná

Tará man gira kárán

Mani békánkén nyádán yakké gestá but

Mani máhig

Mani lóli

Tai jenday warhá án

Anchó béwas án

Ajab jérhán ke wahdé man tará jérhán

Man sahdári tará jérhán

Ajab aybé

Ajab é bazzhenákén

Támé

Ke nokkán jawra cháshénit

Mani názorkén lóli

Man zánán ach tará hechbar nabán békál

Mani nyádáni jágah

Mani torsáni mahram

Taw chinchok bétawáriá mani del gósh dáshtag

Bale zántag raway taw

Ke sahdári mazan aybé

Taw shogr ent ach maná pésar shotay

Tai mehré ke wat zortag, tai kohtá barán gónt wat

Bale tán zendag án

Sáhá naay bandók

Maná cha pad ón mánay taw modámi mani shayray tahá hastay

Mani máhig, mani lóli

Maná taw gira káay

Tai bédánkén béwánki modámi nyáda sázit

Bale é zendagi

Ke róché kohté sahrhénit

Hamá kohtán cha yakké

Taw

Mani máhig, mani lóli

Kay nun tai rangá bejant

Zendagi katrahán shomára nakant

Yakkói ach maná sedaga lóthít

Gón tará wahday dámónay lambá omréá neshtagán wadár kotag, nun maná pach mager ke darda kanán

Ach tará dar pa dar bebán róché

Pa kayá didagán shahára dayán

Kay tará pa maná bechárit damé

Kay maná sáhay jágahá kasshit ke tai washbóá beátárit

Kay maná lankokáni pawrán cha pa tará lahmoskén samáré bekant?

Kay tará zémelá besázit damé, man tará wahdé eshkonaga lóthán?

Kay mani lonthay bátená petthit, o maná táma kant tai táma

Man bale angata hamá paymá

Tai drohén gellaháni báposhtay sártokén namb ér barán kotant

O wati andará dega jáhé ars yak kabréay kashá gwartant

Del maná rók rók chárán at

Ach delá posht mán dát, shotán

Byá tará dur, ach watá gestá, kammoké gón watá baraga lóthán

Ach watá nun man sar geraga lóthán

Bastagén dar

Hórkén bám o rólah ant

Chanké dard ant

Tramp trampá

Mechácháni gédiá pálátagogant

Lahtén béwánkén wadári tránagá

Bastag gobár

Hórkiá anchó chakárén andaré

Ke gománag ham kodit

Rang o bó ant sheng o shángén didagán gisshénaga nabant

Wáhagáni jón dhundhá sraptogant

Del omét ant har sabáh pollá srabant

O bégahán gimmortogant

Lahtén ómánén sapar

Angata sar geptogant

Ráhi nabant

Shap kaptogant

Hastiay jend ent gwashay ke sáhegé

Máraga nabit

Neshtagén sáhá shamoshtag jonzagé

Zendagi ham ché o chéá pánag ent.

“Agán...”

Man tai dard o zahirán cha damé sar gwastán

O tará nökén dega rangéá márag lóthet

Bechkandet

O padá bechkandet

Béwasi dastá shahárit

O mani arwáhay háká dasta jant

Polkéna bit

Andéma bit

Chihálán prenchit andará, taw angata wátara nabay?

Sharr ent, mabu

Bass yak baré émen bekan

Wátara nabay

Har do azáb én

Taw o man

Inchok mani é zanzarag

Inchok tai nyáhag modám

Hórkén zerá chawlay sapar taw distagant?

É tai wadáray sáhat ant chammán mani

Zánán taw bé man éwak ay

Zánán tará

Bé mana nabay

Man gellah án

Wasshána bán

Byáay agán

Drégatay sápar

Del gwashit ach watá darámad bu

Rahgwazi ham watá magend o begwaz

Pa watá yak baré ón chakk majan

O wati námay mardomé ón mazán

O wati shahrá damé mán matarr

Sherisshay sáhegay bar

Taw zánay?

Sherisshay sáhegá, némróchay tháká

Man o Mehlab, awal randá

Dochár kaptén

Man némá gón kathurá

O á

Némá suchenay tábá gón bandók at

Ketábay ták gwátá layb dárán at

O may nyámá

Mani pet anga warná at o máti békasi wáb at

Má har do

Haw, man o Mehlab

Modámi wábay dombol dáshtagat

Shapádén pád malláná

Baré yak tábéá dhakká warán o baré pisshok kathuray sest o dantánay
shamá gam chondhetant

Nazánán chéon jérhet

Kadi bégáh wátara bit?

Kadi máti pasá dóshit?

Kadi man chá grádán?

Padá duttáni trómbag

Padá arsay hayál o tránagá kaptán

Mani dástáne Yusof

Dur kaptag

Zolaykhah zár o peryát ent

O Yusof hoshk o hayrán ent

Padá ché bit?

Mani némróchay béwábi

Kojá é Yusofá dárit cha zendáná

Kojá pashkay á démi dámoná derrit

Zolaykhah balkén rakkit

Bale Mehlab...?

Begenday zendagi Mehlab naródénit

Padá ke hawra gwárant

O kandhok ápa larzénant

Padá ke shapa kapit donyá

Sherishay sártokén polláni washbó

Maná ázátaiy átáray lahmén tránagána géjit

Ta jérhán

Maróchi dors pir ant

Mani máti

Mani abbá

Sherishay sáheg o dastay mani god

Mani suchen mani bandikk

Mani á dástáne Yusofay némróchay wánag

Mani arwáh

Mani Mehlab...

Haw!

Sad drégatén man dástáne Yusofay wánag mazántén

Jalén némróchá bwapténán

Pohl

É mósománá zobán pera bit

O darda wánant

Maná gón zenday drahén azábáni kessah ant ke má chó jetá én

Tará gón zenday drahén ométáni ták namb ant

Ke dard sabz ant

Nun ták o bar kan

Edá nun éwak azáb wayl ant

Mani shoházá

Tai shoházá

O may shoházá jetá jetá ant

A walk

Man o shapay darámadi hawáriá dar átkagén

Darámadén tahárié

O shénkay lambay syáhiá darámadén, lagoshtagén o chondh chondhén
ásmán gón máhéá darámadén

Rawán atén

O dur mawjerén nedáragá darámadén negáhé shánk dát

O jekki jat

Mecháchán yakk o do barán é duriáni dard lahm lahmá chokketant

Tahár kot

Nedáragán damáné ach hayálay rangá dert o bort

Man angata darámadén shapay samár o rang o bóá gár atán

Baré baré

Man o darámadi anágahá sobak sobakká dur dur

Man pésará o á padá, baré do gámay duriá

Baré baré hawáriá

Do sáhegá rawán atén

Watkoshi

Hamok damán margay wáhagé mani tahá merit o rawt

Man éwak án

O zendag án

Jahán gongén aksé o man lonthwánén chammé án wati tabá bezánt
zendagániay baré warhéá wantagant

Taw zánay yak yakká man drohén azáb sestagant

Tawámén dard chondhetag, karótkagant

O brahnag án

Sarpad án

Maróchi man gón mólomán delay tabá honar kotag

Padá

Má ták chondhetag

Golábién golábéay

Káay

Nyáay

Sestag o wadáray del man chondhetag

Watá gón dróg bastag o

Tán dérá ars kandetag

Watá maróchi ráh beday

Maróchi dors átkagant

Saminay nambén tránag o baháray godhsari malár

Durén halkéá gwashay chó kárhé mahparán watigán shenga kant o tába dant, padá samárit bála dant o thahka dant bátená darámadén drohén hayálán zolpay thálán sestagén patáit lankokay sará o dur gwátéay mayára kant drohén samár o washboána sendit cha watá jetáha kant

É mahparáni mangali chó gerdén saggay sháréá kojá kojá arhána kant kojám dár o dhagarán mani azábén bahtéay rasit o shapa kapit, golzemin gón ázmáná dura dhokkit sáhéá...

Watá cha man shezára bán

Hamódá róch mawjer ent gwashay baré baré ke jáhé sáhegá kapit o jáhé jáhé shahma kant é zendagi do ranga bit anágahá

É del gwashit tará nebisán kágadé

Gón washboáni mósomán gón tájagén baháréay hamok nedáragay tawámén rang o jalwahán

Gón wáhagáni mahramén hayáli tránagay zerá

Gón sanjay drapshenákén mohragáni poshtay drostén rozhn o shahmay dróshomán

Delá bale hayál kot ke chosh nabit embarán

Nashanzetag shamoshtagén gománay aksay jambarán, nán gwartag hawr o harragán, ragám o tánahi jorhán, na druchk nay ke góloán, na kabg nán kapódarán, kapinjarán, na bolbolán, na shántoláni báenzolán modámi bál gón atant

Na zémeláni száz péshigén warhá atant

É dors matth butagant

É kollén marchi jérhagán wadi kotant

Bale man hech kolawh nakot

Nán mahparáni sáhegá

Nán jambaráni nambiá

Nán mósománi proshtagén hayálay shishagáni thokkorán tayábá rékay márhia sarámadén gwashay man chárágá atán... watará máragá atán...

Wadará anchó béwas án

Kadi dhorán...!?

Kadi maná zeré padá kolaw bekant

Joshán án jenday andará tachán án hónay jághá chó shiragá

Padá man jáhé gón watá dochára bán

Marhá kanán

O sara gerán

Éwaká

O bé watá

Bale tará cha pad agán man zendag án, ta mortagán yá malkamutá pánag án.

Róhél

Chinchok bétawárén johda kanay

Heccha nagwashay

Sója dayay

Man delá zánán ke cha taw badter án... taw ach zobáná gongé ay

O man wati pegráni lellek borretag

Á ham bezán ke daste wat

Taw sajjahén róchá wati jenday tabá harchi gwashay

Wat sarpad ay

Yakké man án ke góñ watá harchi gwashán zenday tabá násarpadén laybóké
án...

Taw yakké ay dardá wati náray o saggay andará

Man yakké án ke góñ watá har róch merhán békánkiá

Jendá wati thappi kanán góñ kandagán

Róhél

Byá góñ tará rázán delay labzán kanán

Bébáwar ant, pédáwar ant kerr o gwaray mardom drohén béde tará

Man zendag án hasti wati man martag o zánán watá, dódán maná bazzag
kotag

Taw eshkonay?

Delgósh anchó gwar kotag, záná gwashay taw eshkonay o sarpad ay

Bechkandán kammé pa tará

Byá nun dega gappé kanén

Taw ach maná góyák o zántá zur o bar

Johday wati yak rezzahé hayrát kan taw pa maná

Rohél, O jáne Mehlab!

Shográ gerán taw gongé ay, ahday tabay rangá janay

Wadármayyet

Tará gwashán ke taw padá nayátkagay

Tará cha pad damag nun wahdá pésh piriá sar ent

Gón watá drohén azábán sáza kant o zaym o zangán móndharit

Mótka wánit, zára kant

Kohta bit ke pa chiá man zendag án, bale wadár zendag ent, kojá merit.

Nun dér ent per natarragá tai

Nun nökén rang o dáb záher ant

Nun edá mósománi éwánthén

Dróshomá sangarit pashómáni

Nun edá bétawári sáhél ent

Mardomi gongdámén chihálán

Róch o shap tors o bimma ródénit

Shahray dhiwál jangjáh ant gwashay

Róché yak dardi kessahé kárant

Didagán did sakk padarda kanant

Man wati hastiá pashómán án
Drégatéñ man shopánké buténán
Dar o diwál ke bedisténant
Éwaká nábezánti dhóbártén
Éwaká wáhagé becháréntén
Damk o dar taw nadistagant dér ent

Delá gwashán ke namdié tará nebisán rág dayán ke shahre mordagáná
béwasi nebeshtah ent

Pasil o bán satar habara kanant
Drohén tahár o chérokáiá
Chó kór o karrén dalwatá chedá gwazant
Delá gwashant
”é ádat ant”
Hamá ke sagg o wákay shárá bastagant
Wati tahá sochant, brejant o béwas ant.

Kay ay?

Mani darámadén ketáb báza bant

Wantagén, nawantagén, drohén gománá bára bant

Hamok bará kabáth man ke pach kotant, darámadén sarokk atant

”tai naén”

”mani naant”

Bárén chinchok wahd gwastag wantagant bale cha kessahán o gésh hamá wadár wantagant

Hamá pakár wantagant, drohén mani kabáthá ér atant, darámadá

O báz jáhesh geptagat mani hayálay kóthiá, mani karáray dámoná

Man angata nazántag at é ché gwashant

Napahmetag ke kay o kayi tahl o shakkalén gománá poll o konthagáni kessah ant

Bale hamok bará ke wantagant ta gwashtagant ”mani naét”, o sestagant man ach watá

Mani tahá ketáb éwaká ”darámadén wati” naant, dega hazár némtawámén dróshom ant

Na báló ant, na jengol ant

Na bona gerant, nay ke bála bant, rawant

Bánzol ant ke móray jáná sestagant, lagatta bant

Tán wahdéá chenag bebant

Lagoshtagant o páthó ant mani darámadáni dorsén wáb gróhag ant mortagén o kaptagant, chenaga nabant

Mani hamé darámad ant baré baré watá gwashant, shayra bant o sawta bant

Maná cha báz mohkamén o yágién habara kanant

Lagór éwaká mani kashá, mani hayálay pirén mósom ant, na burra bant, na bara kanant

Hamé mani ragám o shanzagáni dozhmen ant modám tákchandhay aksay dardá pánag ant

Yá gón maná sapar kanán, gesara kapant

Man dama barán, watá gwashán ”mani tahá ke har kasé mani naent, mani naent

Dar áyagáni ráh nabastagant, dar ayt, berawt, ta balkena watá dochára bán”

Bale kojá é mánessháni sáhegán jetá kanán

Tahára bant o shapa kanant bale sedag shamoshtagant

Kojám?

Ketábé án ke wábé án? Pollé já ke móri báenzolé?

Man yági án ke zendagén lagóré án

Hamá ke dur neshtagén nedáragá do sáheg ant ke lahm lahmá palpathant baré baré

Gongén akséay tahá

Yakke angah sawta jant o shayra bit
Baheshtén wábay sarshapé ke tán sabáhá ágah ent
Gomána kant o talwasit

“kojámiá gwashay?”

Hamé kai kamátágén wadár kalkashánay shishag ant, ke rada dayant?

Maskará kanant

Gón dastéay shaháragá gobára bant

Kojá mani kasánokén é sháray lamb

Sohayl o máhekániá gomána kant?

É dors pa maná darámad ant

Man éwak án

Man bas wat án

Shayr

“Aksá bégáhay koli bála kanant béwánká
Zikkén sácháná dega némagé gwartag balkén
Nambién gwát mani chárh o tabá tápénit
Taw ke bégáh kotag rangáni drohén bráhay sapar
Nun maná wassha nabit éwaká sanjay chárag
Kad padá hámén bebit gimmortagén maccháni wadár
Chesh tai dhakkay dapá páda nakedzit, neshtag
Dróhit rózard mani zenday drohén rótápá
Chinchok garmágén badan ása balit ómánén
Sártokén gwát hayálán chetaw gwázi dárit?
Shirkenén atra shalant sáhay drohén chawlay proshag
Zendagi aksá nakasshit mani bechkanday
Taw ke bámgwáh mani distén ta bégáh máret.”

Górtahár

Dóshigén wáb...

Ásé ke andará cha maná namba kant gwazit

Wat ágahi

Óbálána zurit ásaray

Táhira bit gam áshná

Del bésarén ómána kant

Har chiz jenday sáheg ent békánkiá andéma bit

Mehráni mósom pétkagén yak kágadé

Tákchandhay zardén tákéá

Nazz ártagat bárén kojá

Shap sarjamén shoházagá gwázéntagat

Dam bortagén mahkáné at hambal mani

Shapáshnáén ágahi chammán mani bokkána kant

Wábán mani chokkána kant, béde maná kassi dega kerrá narawt

Har do shezár én ach watá

Hamzán atén má o wadár

Man zendagi gwázéntagat yakkén shapá

Jenday kashá

A touch, a click

(Dam baragay námá nazmé)

Oo mehrdar!

Oo delbadar!

Taw thappéay shakurtagén trekkokáni bósagay warhá sochay

Na mehré ay, na kocchalé

Cha andará taw proshtagén damáni thokkoray warhá na zorta bay na dróhagay mayáray bochkahá trahay

Taw zánay lahtén róch grána bit

Bale gwazant

Gwazán gwazáná pash kapant

O éra bant

Chó wasshén wahday tránagá ke sestagén sawáséay pochag, damáné mahtalán ke par rechit

Gomán lankokán wati tabá barána kant tán sicchená besombit trakkéay pochol

Chó sotkagén sarigéay ke pacch o thong honara kanant o chéra bant

Anchó wáb o ágahi

Mani damán proshtagant

Kay ent ke dam baráná gáma jant mani tahá

Dar á, beraw

Oo delbadar!

Oo bézobánén wáhagay tapar!

Maróchi Mehlabá gón lankokán begoddh

Hatar beday

Oo dam barag!

Oo zendagiay bó!

Taw byá benend man kessahé kanán

Ke hastat yak métágé delá

O hastat yak bálóé

O bálóá cherágé hastat métágá

Bale cherág mortagat

O métágá modámi shap hazár chammay kórén póshá tal mán tal

O sar pa sar gwazán atant

O báló, bé cherágá zendag at

O kórén didagán cha yakké at

Bale tán kad?

Nazánay zána bálóáni báñzolán ent zendagi?

Taw bell kessahá cherág o bálóay

Man sáhegáni kessahé kanán

Hasta bit sáhegé

Shegán choptagén do chammi kónsay chérá zokkorit

Baré baré gorhit

É bébadan

Badanbadar kojá berawt?

Nendit, nendit

Shash hatam halása kant

O tákchandhán shash dega chó nokkay tokkán éra bárt

Hatamzadag!

Hatambadar!

Kojá shotay?

Benend edá

É kessaháni dardá gendagá ay nán?

Hamok damán lonthay hónán zarda kant

Kodit zend andará

Nun lahm lahmá oppa kant é zendagi gwashay é thapp wassha bant hamé warhá

Oo chammbadar!

Tai chahragá dega janant

Taw mordagáni wábay wáhagay warhá shapán gorhénay kondhéá

Taw labzé ay karotkagén

Shamoshtagén

O káth o kutthá pad

No space

Formatted

Gwashay é eshk zikkén ent

Gwashay é eshk zikkén ent

Haminchok nót o porbál ent

Haminchok dardázát ent

Gwashay man zi tará distag o marchi bál ródéntag

Gwashay man drin shengéntag o gwátay lankokán gón ent

Man rangén án tai rangá

Gwashay bechkanday ádénk ent maná chárít man bechkandán

Gwashay donyá tai aksé mani chammay tahá dratkag

Man harchont ach tará gestá watá chárán tará gendán

Gwashay man pokki án barpay rechánán ancho békár án

Gwashay del cháté áp kaptag hamé zuttán

Mani hóshámi nambéntag

Gwashay man tramp trampá áp buán án

Jorháni potthahán gón án

Gwashay washbó nun bechkandant

O zémel sáha kasshant

Zendagi százé

Gwashay harkas tai áwázá gappá ent
Gwashay man nök eshtáp án
Shapán pánag bayag lóthán
Maná labzáni dhokkál ent
Haminchok gón tará gapp hast
Nazánán ché gwashaga lóthán
Gwashay man nök békárh án
Nalóthán hechkasi nyádán
Man bas gón taw bayaga lóthán
Gwashay man hórk án anchó ke donyáé tahá dárán
Gwashay man sarjamán anchó ke jendá ham nawáhán
Taw anchó nök waddán ay
Gwashay man zi tará distag o marchi zend brahdár ent
Gwashay hecchi zemin o ázmáná pash nakaptag
Taw tahná ay, man tahná án
Á wasshi zi padá atkag
Man zendá dóst dárán án
Man jendá dóst dárán án

Hodáy métág

Dur

Sakk dur chahragén

Dawráni wábán

Sakka bant

Ahday wadáráni chamm

Bárén kadi dóráni bári mattha bant

É zendagi

É yakk o tahnáén sapar

Har do sawásán sestagén

Gok bastagén pádinkéá

Gerrán ent jáhé róchéá

Jáhé shapá baddhá kotag

Jáhé shodá wápéntag o shar thappetag

Tán endega sohbay sará

Chammáni syáhi áragi surmag kotag

Lontháni tal bechkandagán gón trakketag

Hónáni panné shéptagi
Kaydáni jáh morwáred ant zolpán sará per shántagant
Rangé anárkán matthetag
Anchó delay zangay warhá
Pásaga nabant
Sahtáni dróshom mattha bant bárén kadi?
Bárén kadi é durián sara bit ahday zendagi
Wázmandagén máhay sará
Lóthé delay béhájatén
Tahnáén bazhné béwasén
Har shap yak chammé nazza kant
Gón lankoká estál o máhá dasta jant
Har shap hamé rangá hazárán wáhag ant
Léthant o chammán mocch kanant
Bárén kadi wáháni hasti mattha bant?
Wáhag mabant
Dazras bebant...
Hálé byátkén róchéá
Gwátá patátag zendagi yakjáh kotag

Anchó zeminchandhá gwashay

Kabráni mahram ártag o námahramán léns dátagant

Anchó hawár ent zendagi jáhé degar

Bárén kadi dóráñ cha durén dawra bant

Drohén kessah tará góñ ant

(Shahid wája Ebráhémay námá)

Wadáray

Dard o tonnay

Shod o damtósiay

Wati zenday moráday

Ométay dam barag

Gón malkamutá jang o chópay

Wati mehráni jérhag

Wati arwáhán módag

Baré yak wábéá gón éwakiá kessahay árag

Gwashay é zendagáni bas hamá róch o shapáni ásay lamb at

Na péshá zend butag

Na démá zend pédák at

Mán kóh o gár o daggán dard pérháhag

Watá zahirónké márag

Wati jenday wadáray kessaháni gósh dárag

Wati jenday gománá hamok chihálay trekkáni sará hiskárag o chammáni shódag

Padá pád áyag o ráhán tai shoházay borrag

Kojá gár ay?

Gwashay taw kessahé pash kaptagay ér ay

Taw sakk dur ay

Gwashay má angata jérhén taw káay

Begenday taw wati kessah, wati tonnigén didag

Wati shap kaptagén armán o wáhag

Hamódá kohéay lambá patát o chér dátant

Bale apsóz o armánán sapar borret o sar butant

Taw parcha éwaká neshtay?

Padá parcha nayátkay?

Drohén kessa tará góñ ant

Kadi káay?

Wati hálá kadi káray?

Edá labzáni máná dors dróg ant

Tai wátar nabuag

Tai á goddhi majles

Tai mehráni sáheg

Tai ommétay tránag

Tai hechbar nayáyag

O tai béwánki o bégwáhi rást ant

Ali ján!

(Nadr pa tai bétamáhén arwáhá)

Bétamáhi, béwati o békasi

Duri ant nyámá negáhay rostagant

Nazzik gwará gendaga nabay

Oo gwandhalokk

Gógái layb o gwáziáni mósom ent

Zenday morádáni sapar békawar ent

Drachkay bará chó sestagay, dur kaptagay

Durén sapar taw raptagay

Wátara nabay

Zánay gamáni syahshap ant, bándáta bant

Taw nyáhagay ahdá shotay o zendagi anga tai bramsh o cherhekkáhán zarit

Bé taw abétk ent róchay gam

Bárén bechárét ángor ent?

Bárén bechárét ke koj ent?

Sad bárén cha má sestagant

O wáhagáni chillekán róché sedant

Koht ant o bazhn ant békésás

O tai wadár

Anchén gam ant kóhá kapant

Sénag tal ant

Pa taw padard ant kerr o gwar gimmortagant

Cháraga nabant

Dard ant delá ke dóra bant

Koht ant trahag béhála bant

Bazhn án ke gwandhén wáhagé ham taw nakot

Bazhn án ke darday kessahé pash kaptagay

Wahdé shotay

Bechkandagáni mósomé góñ wat patát o bort góñ

Bechkandagáni mósomé góñ wat patát o bort góñ



Delay darwázag

Taw sabr kan

Benend edá

Delay dar ent

Tán pach bebit

É wahda jant

É wahda jant

Watá cha dar man tará shoházán...!

Oo mehray bánzol, chiá chó bréjant tai pollén ambáz

Kojá zhilinkant maróchán pádink mahgoláni

Taw chón abétk ay, taw chón gamig ay, tará man gendán

É ás o pisshá kojá shotant shántoláni zémel

Oo émeni shántolay kodóhay kadi bay wátar

Kalátén jammar kojá maróchán tai nóda shanzant

Man tóshagán zurán dar kapán pa hamá nun halkán

Man régzárán janán án sarsar tará nagendán

É shahray damkáni tákchandhán nagendán ásar

Kojám goláb ent ke tákchandhá srapiit o bó kant

Kojám damkán maróchán rozhnái zendagi kant

Man dhassa lóthán, neshána lóthán

Cha kórchátán

Man ásay daryáay lambá neshtán ke tonna próshán

Man chón ganók án ke kágaday lóg o hawra lóthán

Man zer tai ázmánén rangá tahára gendán

Man gár o bégwáh hodáyá cha náhodáé lóthán

Oo émeni! Man tachán tai poshtá gayáb o kóhán

Man nábezánt án

Watá cha dar man tará shoházán.

Zenddám

Oo zendagi

Gwashay taw yak ketábéay awalsará nebeshtag ay

O man drohén ketáb bas tai shoházagá

Tán goddhi labzá wantag o nun jérhagá án

Taw kojá kojá atay?

Edá man án ke man wati delay drahag o drikkagáni nám bastag zendagi

Man wáhagáni mordagén nedáragáni wángiárá ché gwashán

Yá wasshiáni mósomay á goddhi tákay gimmorag

Ke chamme wat man distagat

O pa béwasi chará damáná gwastagán

O dazradi hayáléay hodáay dastá dát

Trahán

Trahán

Trahán butagán

Nun delyakim neshtagán

É sáhay chápá pa watá kojám kojám azábay bot natráshtag o kojá kojá nanacchetag

Tará gwashán

Kojám ay taw?

Gománá yak thahéntagén jahánéay hodáay rang

Yá é damáná dard o tirokáni hastiay drohén sawab

Tará, oo zendagi ke man

Damánokéá pésh genday hapt rangá tákéay sará nebeshtagat

O chamm sakk dátagant

Tán dérán

Dérán

Sakk dér

Taw shengetay

Taw anchosh ay

Kojám ketábay tákéá nebeshtagén tai nám o rang habara kanant

Wati bégwáhiáni gwáhay patthagá gár án

Tará gwashán

É gáriáni rangá ché gwashit jahán?

O gongián kojám zobáná gappa kant

Kamála kant

Man án ke gón maná damánokéay rang arhant o gerd gerdá tarragá ant

Kerr o gwar

Nán ázmánay chahragá janant

Nán koll jahánay dróshom ant

Chó háltákay labz o aks ke jenterá droshag bebant hamé warhá man rezzah
rezzah án

O purrokéá gón án halk o métagán

O churiáni latth o shiwalag

Chorhénant thokkorán mani

Baré man motthokáni kálkéá arhána bán baré

Kasánokén do wáliay shamá trahán

Baré baré wa lonthokéay keshkokán man zokkorán

Baré man lechchán dantolán

O kónsán jekka bán baré baré

Kojá kojá sapar kanáná sar bebán

Padá wati shoházagá?

Kojám kawray lambay bucchokán gón latthokán bechóndhán

O kojám máhigiray dámá yakk yakk kanán?

Bechill bechillá é jahán o ázmáná árt o hákay rezza hán mani

Kay ent ke rópit hóra kant o lésa dant o addh bekant

Padá maná

Mani warhá

Goddhi jón

Zend dhokkálé mani bátená kaptag marchán

Mordagá chón bekanán

Goddhi sahdará kai jón bezán chóndhetag mortag

Lahtén pegr ant ke saray mázagán kabré lóthant

Lahtén aks ant mani chammáni tahá kaptagant jón ant

Andará métagé hastat genday?

Gwát nun góma najant chammagay delbanday sará

Máh o mahtán gwashay bas hayáli shahkár ant

Kawr o daryá nun gománá kandh ant

Zéd chié nun mani tránagán béhál kotag

Mósomán ták drohén chandhetagant, endres ant sháháni sará

Shap sawásáni tahá sestagant ráhay néma

Róch mán kambaléá pétkag, kashá damtós ent

Sáhkandan delay darwázagá neshtag drikkit

Pors dáshtag man o arwáhá maróchán mehray

Áh, bé dhass o neshánén margá

Kópagán jendéay mayyet mani baddhá kaptag

Kay maná kabr bekant o bedárit mani porsá

Jend dhokkálé mani bátená kaptag marchán.

Drohén sahdár margay támá chashant, dardará kay sarpad bekant

(Abbáay námá)

Oo mani zendagiay sharrangi

Oo mani sáhay zémelay wáhond

Oo mani thahk o kandagay bonzeh

Tai tawáray o gwánkay nadrán man

Taw hamá ent gón man bétrán ay, zendagi bétawár ent wayrán ent

Man tai majlesáni korbán án

Omréay naksh shoshtagant wahdá

Taw agán per betarray, ché genday?

Gwandhói pir o ájezén kabré

Métagi jóné kawréay lambá

Chó wa dam bas tará gón bandók ant

Haw, bale man baré baré jérhán

Oo mani bátenay arwáh

Márá métágé hastat

Gwandhén káparé hastat

Bágé at tai námá

Marchán ódá hecchi nest

Néstiáni gránén bár

Kópagán kotag baddhá

Dar pa dar man pera tarrán

Darda bit man wahdé tai dard o dóráñ jérhán sáh

Taw mani ázmánay rangá ay

Taw mani koll jahánay paymá ay

Taw hamá sáhatáni hamráh ay

Zendagi próshagá mani kaytent

(mohkamén kóhay dhawlá taw

Man tai dámonay killag)

Taw mani tonnay sártokén kóleg

É sapar zendag ent o hamráh ay

Oo mani zerday tóshag o chammag

Gwashten o tai gapp o gál

Zendag ant é delbandá

Man bale talwasán tai didárá

Man bale talwasán pa tai nyádán

Mehlab halásén kessahé

Tramp trampá darda missénit maná

Mehr chó jóláhegá péchána kant

Nakshán delay

Gam kay o kai chammána ront ach métagay damk o darán

Bázár o bág o kahcharán

Del rostagant kónsáni nazzén rólahán

Zi bégahá rózarday rangán grétagat béwánkiá

Diwánag ant...

Inchok nazánant tránagi danzán shalant

O shishagi diwálay á dastay nedárag ke srapit

Nograhén ómánay sagg sak rada kapit

Lontháni nambén bósagán sóraga kanant

Mehlab halásén kessahé

Pirmáti shap gwázénagi nimmóné labzán retkagén

Érahtay rangén sáhaté

Ér bortagén darday warhá béwára kant

